

摘藻堂四庫全書薈要

集部

欽定四庫全書薈要

集部

御選宋詩卷二十四

五

詳校官原任主事

臣

李斯咏



欽定四庫全書薈要卷一萬八千三百三十一

集部

御選宋詩卷二十四

五言古詩十五

文天祥

題周山甫錦繡段

客從西北來遺我錦繡段上有雙鳳凰文彩何燦燦置
之篋笥中歲月亦已晏天孫顧七襄雷電下河漢鳳凰
忽飛去遽然失把翫貧家機杼寒秋蟲助予歎



題梅尉詩軸

乃翁聖俞君瑰辭燦琳瑯吾鄉歐陽子逸韻諧宮商
人物雄中原園囿盛洛陽醲郁追皇風詭怪抑晚唐雲
仍四方志生長百戰場憂國杜少陵感興陳子昂我亦青
原人君遺明月光掩卷不能和握手談肝腸

題延真羅道士玉澗

雙巖夾方流知有至妙蘊山石發清暉草木得餘潤泉
源皆寶氣樵牧駭潛蜃仙翁獨危坐華池養水性神澤

溫而栗骨峭老益勁苔磯枕泓碧時有魚出聽麋瓊飯
潺湲沖淡意無朕

燕子樓

自別張公子嬋娟不下樓遂令樓上燕百歲稱風流我
遊彭城門來弔楚王闕問樓在何處城東草如雪蛾眉
代不乏埋沒安足論因何張家妾名與山川存自古皆
有死忠義長不沒但傳美人心不說美人色

聽羅道士琴二首

斷崖千仞碧下有寒泉落道人揮絲桐清風響寥廓飄飄襟袂舉冰紈不禁薄紫煙護丹霞雙舞天外鶴

吾聞泗濱磬暗含角與徵又聞天樂泉淨洗箏笛耳如
何碧一泓乃此并二美藍田滄海意請問玉溪子

題宣州疊嶂樓

初日照高樓輕煙在疎樹
峩峩遠岫出泯泯清江去
簷隙委殘雷屋隅連宿莽
蒼蔚互低昂熹微分散聚
城郭諒非昔山川儼如故
童鬢已零落姝顏慰遲暮
沉沉澹

忘歸欲歸重回顧

題宣州推官廳覽翠堂

并序

前宣州推幕季君於其解作亭梅聖俞以覽翠名
之而為之記今去之二百餘年碑埋沒久矣天台
陳君客實來發而得之復表之亭上江山如昨翰
墨宛然廬陵文某時守茲土既為作顏間二字復
詩以志之

都官自楚產文采光陸離當年從事君如與山川期歲

月忽已適天球落塵土豈曰無嘉賓過者不我顧誰令
赤城子發坎出方珉靈物必復見其見乃以人回視城
南端飛甍俯蒼蒨物理有屈伸流峙豈云變寥寥南樓
月至今有遐音千年一邂逅共調風中琴亦欲結方軌
攀蒨事幽尋行行且言邁踟躕思何深

夜坐偶成

蕭蕭秋夜涼明月入我戶攬衣起中庭仰見牛與女坐
久寒露下悲風動紈素不遇王子喬此意誰與語

發彭城

今朝正重九行人意遲遲回首戲馬臺野花發歲蕤草
埋范增塚雲見樊噲旗時節正如此道路將何之我愛
陶淵明甲子題新詩白衣送酒來把菊卧東籬

新濟州

借問新濟州徐鄆兄弟國昔為大河南今為大河北垂
雲陰萬里平原望不極百草盡枯死黃花自秋色時時
見桑樹青青雜阡陌路上無人行煙火渺蕭瑟車轍分

縱橫過者臨歧泣積潦流交衢霜蹄破叢棘江南寒未
深銅爐獸花赤為知行路人鐵冷衣裳濕

發鄆州喜晴

烈風西北來萬竅號高秋宿雲蔽層空浮潦迷中州行
人苦沮洳道阻路且脩流澌被鞍轡飛沫綴衣裘昏鴉
接翅落原野慘以愁城郭何蕭條閉戶寒飈颭中宵月
色滿餘光散衾裯余子戒明發飛霧靄郊丘微見扶桑
紅隱隱如沉浮身遊大荒野海氣吹蜃樓須臾劃當空

六合開沉幽千年厭顏色蒼翠光欲流太陽經天行大
化不暫留輝光何曾滅晦霽終當收嚴霜下豐草長歌
夜悠悠明日東阿道方軌驟驂騶

贈許柏溪惟一

長風吹飛藿蜻蛚吟野草流光速代謝興懷令人老遊
子中夜起悠悠酣且歌明月委清照江湖秋涉多豈無
臨淄魚亦有邯鄲酒懷古招王孫登高重回首

許月卿

箕山

箕山惟一瓢，襄邑亦四壁。古今一許氏，傳家以清白。
茶山與東萊，三詩映圭壁。後來二三賢，題品互紬繹。
南軒推學授，晦翁要事實。亦有小東萊，經濟亦何切。
極意深源流，敷殖久大業。臨川有二許，我來秋蕭瑟。
撫卷三歎起，寒花香的皪。

林景怡

曉起

天雞弄喔咿殘星在斜漢整衣出幽扉山城漏初斷微
微水風生冉冉田露散此時遊葛天淡然空百羨海色
上寒梢漸識梅花面

林景熙

贈東上人

岸陵幾紛紛歧路誰了了中有定慧人脩然坐深窈山
空諸念消月墮孤禪悄一室虛白生天雞弄清曉

題水雲深處

霏霏弄間態濫濫揚素紋幽人不可即但見水與雲蒼
狗紛世情瞿唐在平地所以盟白鷗萬荷最深處

故衣

篋中出故衣絡緯生四壁昔年慈母線一一手所歷春
眷遊子心惻惻虛堂夕逝水不返流孤雲杳無跡空令
攬衣人一線淚一滴衣敝奈有時母恩無窮期終憐寸
草心何以報春暉朝寒縱砭骨念此不忍披且復返所
藏永寄霜露思

九日會連雲樓分得落字

冉冉海霧深荒荒山日薄登高集華裾縱目天宇廓落
葉悲徂年寒英照深酌心醉乃文字意行非澗壑緬懷
斜川遊此道久寂寞胡為吹帽人白首戀賓幕窮途謬
行藏異代懸美惡我愛漉酒中西風不能落

遊仙壇

窈窕懸僧廬空山斷諸想上鄰境沏寥下瞰色蒼莽猿
鶴無宿期今古契真賞坐中風雅談林壑散清響涼飈

灑我髮白雲隨我杖醉卧松下石不知海月上

過風門嶺

客來自風門颼颼撼兩袖溪迴衆峯新畎絕一嶺又行
行春日微怪禽啼白晝流年感花稀古道表松秀聊此
寄小酌餘酣掬山溜

酬謝臯父見寄

入山採芝薇射虎據我丘入海尋蓬萊鯨鯢掀我舟山
海兩有礙獨立凝遠愁美人渺天西瑤音寄青羽自言

招客星寒川釣煙雨風雅一手提學子屢滿戶行行古
臺上仰天哭所思餘哀散林木此意誰能知夜夢繞勾
越落日冬青枝

簡衛山齋

虎林一傾蓋草窗雪初殘酒酣夜剪燭妙語鏗琅玕回
首隔吳越清風渺難攀焉知白首餘遠訪滄波間大鵬
九萬里神駿十二閑天風非不高乃樂煙水寬乾坤寄
一齋江湖浮九山何當躡飛珮跨鶴青雲端

宴德初書樓

樓高不二尋已作百尺想中有湖海豪開襟納萬象頗
延素心人談笑落清響鄰花吹午香簷竹薦秋爽於中
了行藏此外斷俯仰西樓富薰天歌鐘樂華敞荒涼風
雨餘山變自來往

納涼過林氏居

出郭已虛曠入門轉蕭森筠棲無六月聊以解我襟紅
日不到地白雲時滿林坐久石根冷酒醒荷氣深飄飄

黃冠客臨流鼓瑤琴一鼓洗我耳再鼓空我心山高水
復迴彷彿蓬萊音興盡拂衣去城笳吹夕陰

寄四明陳楫陽

高人謝世紛誅茅在絕壁十年不下山舊路掩深棘出
門復踟躕觸步有崩石下臨千仞淵毒鱗正紛藉腥風
鼓洪濤石齒鳴咋咋失勢倘一落萬縷那可及不如息
我軀猿鶴與朝夕

方鳳

仙華山

仙華矗萬仞我乃廬其東日夕與山對今茲踏岑巒起
左信奔鹿當前任啼猿大嘯崖石裂一覽天宇空蒼松
飽風雨絕壑挂老龍樵斧不得斲撫根憩吾躬邀哉軒
轅氏問道由崆峒猶傳少女靈鍊玉于馬宮山林重帝
冑香火明民衷我來重懷古攬涕臨西風何當速刺飛
一洗磊塊習

謝翱

寄題何氏綠綺樓

北岸有高樓其南多藥樹仙人晝采之遺佩鄉江渚化
為綠綺琴軫徽微已具有客來南方振衣坐其處風吹
朱鳥巢欲落鳴至曙山分地肺雲水流天目雨別去重
所思別時不能去

雨飲玲瓏巖下

垂雲起欽嵌衣被松與桂夜含星斗光隱若金石氣雨
來輒阻之不得撫蒼翠下有桑門子飲用陶匏器盆中

蓄海石左顧如牡蠣疑此磧上來不知幾年歲桑門却問客所居何姓氏回指南海峯蒼茫倘一至

翠鑠亭避雨

亭有魏王妃所題字尚新王嘗以皇子成德軍節度使鎮明故妃至

其處

客有遊山衣著久如薜荔行行萬翠亭忽作風雨憩仰面無所覩梁間有題字問此何人書婉婉有弱氣云昔魏王妃學書似李衛乘雲到此山灑墨在空翠塵風吹土花倏忽景物異疑此夢與仙不類人間世

觀水

積陰生壑雨野水學江流對屋見燈火相望南渡頭浮
槎到高樹白龜起滄洲變怪若不測神功安能尤稍退
見涯涘及來痕沫收崩濤出白石隱隱如博投水楊洗
荒根素髮生古愁見此倏若化故流還膠舟荒源不可
詰欲盡山雲求

無題

天風下黃葉山樹挂綠蓑世情逐流水東去無迴波可

與語人少不成眠夜多濕雲黏短髮漂泊奈愁何

十日菊

今日非昨日尚覺秋英好明日異今日秋英詎云早所以惜芳人采擷常貴少而彼千載士憐爾獨皎皎晞霜數朝榮零露抱夕槁千載且復然一夕寧恨老

九日

秋風颯以至今日重陽日眼明對南山尚想陶彭澤向來建威幕頗見有此客驅車不小留駕言公田秫一朝

又棄去此意誰能識寄奴趣殊禮風旨來自北只今王
江州建國功第一故是阿珉孫舉動良足惜飲愧望柴
桑稍以自湔滌殷勤白衣餉猶恐不我即中路候籃輿
要致已甚迫葛巾赤兩脚頽然向林宅此翁本坦蕩焉
能苦違物雖然可計取中實未易屈華軒又何羨自載
返蓬華終身書甲子往往義形色如使磷與緇安得為
玉雪籬邊菊弄黃粲粲正堪摘我方持空觴千載高風
激

避暑池上擬古

遊子渺天末，晨光東南馳。良時不易晤，胡為徒來茲。叢
柏結夏塔，輕蒲生夕颼。空有齊紈扇，團團手中持。持此
欲永久，但感顏髮衰。愛爾雲中鳥，浴彼道上池。餘翎委
弱藻，飛去猶淪漪。極目送不返，將以窮所思。

九日前子善來會山中

朝尋寒露枝，暮摘不盈把。風吹西南雲，幽情誰與寫。有
客來縉州，遺我古盞斚。中有鴛鴦文，色如銅雀瓦。浮以

鬱金蕤蒼蘚藉其下此物寧足感聊用助歌者但懷郢
曲悲豈計所知寡

九日禺中登沃洲放鶴峯南望天台諸山

鏡面小蓬島入剡脫我驂舍櫂來沃洲下嶺見精藍修
眉浮天姥天台在其南良遊愛九日巾墮髮不櫛醉浮
秋夕英飢食決明實遠尋竺僧迹俯仰千載陳狂呼許
元度王謝十八人彷彿川谷應草木皆冥冥便欲即之
語又疑物所馮閉目遊太初寥廓以為鄰

五日山中

東隣拔蒲根南隣燒艾葉艾葉出青煙蒲根香勝雪乾
坤生燐火陰碧期月光煙隨艾葉散進此菖蒲觴蒲觴
益齒髮齒白髮如漆餘飲不盡器置之五七日五日化
為丹七日化為碧一服一千年令人生羽翼

九日黎明發新昌望天姥峯

南明剡東山虧蔽草與萊前岡接遠阜樹色如苔莓西
南見天姥旭旭雲日開下有採藥徑仙人招我來手持

白菊花泛以青螺杯傾杯化靈藥蕤芳入客懷俛視浮
甕居白氣為塵埃涼風吹脫巾一往不願回便投此策
竹騎龍下天台

玉麈尾

客持麈尾柄色奪環與玦塵心隨影祛一片若行雪神
獸潛空山何年探靈穴忽失落人手遂為談者悅陰厓
起白氣篆古踰軒頡一拂沉蘚文再拂字不滅三拂蛟
螭騰世眼不能別投爾陰厓顛驚怪吐其舌

謝子靜寄端午藥煎

麤桃弄朝煙含蟲鍊百杵山人入藥籙搗日月逢午甘
酸雜衆味能生玉池乳頗憶越吟人性靜無所苦中年
白髮生寄以潤肺腑為謝山中人願結山中侶

因北遊者寄我眉家先生先生曾宰建之浦城
故末章及之

靈關高縹緲縹緲出曾城其上盤紫雲倏忽牛馬形鷄
鵲不棲樹浴彼清泠泓惟有孤鸞驚銜命此山靈迎風

遡寥廓杳杳西北征羽毛中道折六月霜霰零回首靈
關雲淚下如懸纓

江淹所治縣粵王曾種樹山人雨後來空臺唯宿莽故
人出端平子孫今不武寥寥南峯寺枯禪尚靈雨猶記
桐鄉祠影前及僧語

寄東白許元發

昔我來南方采藥與君遇仙核墮寒蕪水花明遠渚雲
空參語外露下離立處別來荒煙中五閱寒與暑寒暑

豈異初肌髮不如故聞處人道變未得世病愈驅車望
東白此情那可遡倘及乘青蛻為君拂塵羽

秋暑飲僧舍分韻得界字

夜露搖井梧明河涵左界酣眠知何益筋力久已懈餘
氛薄中餐幅巾無所挂欲去豈不能有輒中敗浮醅
濟瓜茗陰鼎漉薑芥忽醉此山中解衣如脫械涼颼埽
地生塵暑焚香邁空巢見落毛石髮卷如薑

擬古寄何大卿四首

空山產桐梓擬作膝上琴琴成不他飾種漆江之潯獨
無徽將軫何以發商音但得獨繭蠶飼之扶桑陰烹魚
腹有膠不患海水深

雌雄雙碧雞所食琪樹鶯來棲藥洞中當春怕乳子其
雌秋別時守此唯雄耳可憐銜子歸萬里渡海水

世傳賣藥翁出市恒騎虎竭來空山中恨不輒與語長
嘯歸無家獨指梧桐樹既指梧桐樹復采梧桐子持以
贈所思浩歌聊復爾

流來山中花紺碧三百里漪漪歛硯雲含風入秋水五
芝與八石往往產其址豈獨秘靈文亦復隱奇士不見
施家郎詩詞獨清泚一朝控白鸞吹笙洗塵滓

巖居效賈島

巖巖百尺屋山鬼寂四壁獨抱震餘桐橫此風中石夢
見一道者手持青瓦礫謂此有至音世人不能識粟塵
起嗟我滄海寄一滴語罷失其處覺來空歎息攝衣起
楚歌斷絃如裂帛懸藤月露深蛟龍舞其側

萍間穉荷效王司馬體

初萍半含絮頃刻開數畝荷生浮其間風雨足邂逅百
年遊子心欲作千歲久昔為浮萍根今為穉荷藕荷高
刺已生魚遊觸其首離離荷下萍吹向白魚口

鄭思肖

詠懷二首

讀書陋巷中愚直與時忤一鶴仰天鳴志不在塵土有
懷諸葛公默然不發語後世無斯人清風激千古

驅車欲出門獨立眺虛曠恣意杯酒間舞劍心悲壯雖
在寂寞濱心實千載上天地固寥廓亦當定所向

吳江垂虹雨後觀荷

睡龍瞪目開射光馮夷宮翻身弄變化
嚙水濕洪濛浪花捲寒雪斜噴清冷風
雨歇龍歸來波心卧晴虹淨洗秋色出
霽景涵青空爍爍錦炫晝新綠妬嬌紅
濕香吹不飛戀抱花心中醉面仰天笑
月照三吳東

虎丘

何年海湧來霹靂破地脉裂透千仞深嵌空削蒼壁山
潤石乳甘秋冷鐵花碧闔閭雲空愁銀虎去無迹蛟龍
鎮竒險拱護梵王宅

古詩

蒼蒼碧玉盤烏兔東西跳一氣母羣兒各弄性情妙雷
動蟄龍飛天老哀猿弔俯首問洪濛萬古一長嘯

周密

題高彥敬山邨隱居圖

我昔遊七閩百嶺爭巖葉白雲漲川原深谷如積雪又
游天姥岑幽磴緣曲折長林翳寒日十里行落葉轉頭
五十年遐想正愁絕開圖意忽動惝恍生內熱何當駕
松广分我翠一疊弁陽我所廬見謂山水穴漂零愧楸
櫟歲月老薇蕨平生既遙集足痺屐齒折何當賦歸田
初志遂所愜懷哉復懷哉清夢繞林樾

何新之

秋夜泛舟

飛星曳寒影野水淡碧空人生定何物扁舟空影中何
年有宇宙生此木末風有力不向上難到蓬萊宮空攀
棲鵲巢搔首如飛蓬俯仰慨今昔此懷安可窮

韓竹坡

采菊

擷我百結衣為君采東籬半日不盈掬明朝還滿枝悠
然何處是千古正如斯

王澹

感遇

光風蕩繁囿，丹綠綴柔柯。
游子去萬里，空閨斂翠蛾。
行雲落江水，酒盡不成歌。
雞飛與狗走，妾命獨奈何。

程自修

獨坐

終南在吾目，秋色遠接應。
誰招天外翠，來此窗中靚。
娟娟初畫眉，盈盈獨臨鏡。
雲去物象空，月出心源瑩。
我欲往從之，有客誇捷徑。
洗耳復洗耳，松風入清聽。

詹本

春日攜客遊武夷

山脚健枝梧百里插蒼峭
粼粼石可把曙色坐遠釣風
水真笙竽歷落太古調衣冠帶莽蒼山鬼驚二妙雲月
正忘年花鳥更索笑迴船翠凌亂吾道付長嘯

皇甫明子

海口

窮島迷孤青颶風盪頑寒不知是海口
萬里空波瀾蛟

龍恃幽沉怒氣雄屈蟠崢嶸挾秋陰挂席潮如山熒惑
表南紀天去何時還雲旗光慘澹腰下青琅玕誰能居
甬東一死諒非難嗚呼朝宗意會見桑土乾

崔瑒

今日亦何好

今日亦何好花下醉狼籍醉中有奇事夢見生八翼浩
蕩排虛空靈君好顏色朱衣持大篆授我醉鄉伯頓首
玉墀下臣瑒才蟣蝨封此亦何功請陳愚頑臆臣家京

口東門前大江碧臣願駕長風吹作酒萬石萬象各千
鐘拍拍大庭國推枕在山中紙衾霜曉月

孫璉

述懷二首

少也不諧俗老去益羨閒百草生已綠春雨滿南山朝
朝荷鋤去既夕驅牛還生長茅簷下貧賤甚獨安但願
桑麻長優游足歲年

坐倦秋樹根攝衣步前丘橫河澹如練破月西南流獨

持一尊酒悠然發清謳俯仰無不足吾生焉所求

楊雯

迢迢空同山

迢迢空同山乃在西極巔玉泉蔭靈芝上有千歲仙
安得凌風翼相從白雲間神仙本冥漠天運仍推遷
不如酌我酒或得成自然田父要我語飲者亦非賢
願君長獨醒加餐足高年

羅公升

脫身軍府暫憩先月亭前挹湖光左右花木交
映壁間題字亦有可觀惜未及見月也

四年塵沙中奔走日不給空歌下泉詩頗愧夔子集今
晨出軍府心與歸鳥急花迎曉日笑樹沐清露濕清漪
舞游鱗照影姑小立重來期秋風領略蟾影入

觀棋

秋風動江臯吹落鷗鷺影先生江湖心收作目中景庭
深樹陰好門掩禽語靜一聲寂寞中恍若隔人境宵中

兵十萬臨敵暇且整斂之塞成臯縱去舉鄢郢僕方棲
會稽蹇足未得騁中原倘相逢亦有憑軾請

早行

殘月不肯吐鄰雞殊未鳴已驚火星沒况值玄雲生居
人酣春夢行客貪修程衆愁春露冷我喜旦氣清小立
著定眼自覺歸路明

戲蕭高風曾孟升二友

丹鳳辭舊棲四海求其凰偶來梧竹間振翮鳴朝陽衆

禽不自揣競欲飲餘光神物要自珍微羽那足當了知
霄漢姿不集灌莽場所憂燕雀雜坐更鴻鵠藏丹山有
佳侶足以陪雙翔人間勿為留歸哉白雲鄉

次韻嚴叔賢見寄

威鳳翔九天棲息惟十洲胡為落人世下與雞鶩遊吟
仙霄漢間清夜瑤琴秋餘音遇風至不可言語求黃塵
隔晨晤回首生暮愁橐弓定何日春馭已莫留柳營豈
云遠邈若青海頭何當踏月來羽衣嘯黃樓

趙善璫

南山亭吟梅用韻

玉輦瑤車具飄飄銀臺路羣姬擁蓋羽太真衣縞素夜
宴瓊花圃玉郎騎鶴赴翠衣凍欲仆芳信誰傳付無夢
高唐賦酒闌散香霧

俞琰

題鄭所南墨蘭手卷

幽花頻晴旭脩葉偃微風名載騷經中千古香無窮何

人為此圖所南鄭仙翁仙翁今何在已歸蓬萊宮我欲
往從之海闊天濛濛

陳普

擬古二首

秋聲金氣流天空露灑灑素波合流月淫淫滿庭霜遙
夜一美人寒閨自徬徨暗塵集凌波輕飈感鳴璫天性
賦貞清動止中矩方世無夔夔子窈窕空英皇抱璞如
臨淵日入不下堂時操弄玉簫空中來鳳凰歲月如流

星髮變面欲黃服玉固雪膚絕意百兩將

同根一味草時命嗟異遇風月芳香合兩地隔周楚爾
生麟趾家朝夕沐玉露我在雲夢林百草相蒙妬白壁
終不緇惇惇亦良苦

呂同老

龍泉寺納涼

靡靡市塵盡杳杳石間灌木蔽榛莽爽籟彌空山飛
甍納餘輝丹雘粲以繁巍然青蓮宮俯此碧玉闌化人

淡無為趺坐觀塵寰
支郎杳不逢玄蟬
噪其間昔賢憩
遊地曾井潛龍蟠
詠歌之所傳百世
猶不刊我生悅超
曠危磴重躋攀
歸隱諒未能遡風
發長歎

葛長庚

游西林

悄然無人聲但有一杯月
誰家鳴乳厖萬籟靜不發蒼
鬚指前路滿地鋪翠樾
清露滴秋衾夜氣飛霰屑
遙岑有無中煙渺天空闊
劍光衝牛斗長嘯蒼崖裂
山行二

三里詩腸酒思渴冷雲曳山腰暗水洗石骨勒馬過斷
橋枯木凍欲折枝頭驚鳥鵲草根鳴蟋蟀試問夜如何
孤猿啼不歇柴門自推敲殘燈更明滅回首古招提地
僻居窮髮紅燈照經幢紫殿閉鎖闥題名墨未乾壁上
龍蛇活秉燭出雲房古徑蒼苔滑歸來倦拂牀聯句鬪
擊鉢老僧擁地鑪坐把寒灰撥黃雞啼四更驚破梅花
雪

行肇

中秋對月

暮雨過寥廓江天正青蒼
列樹無殘陰積水有異光
幽蟲鳴欲徧宿鳥驚忽翔
永夜如至公鑒我吟清章

送希晝師之九華

忽起峯外心跡謝人中
境雲去竹堂空鷺下秋池
靜野宿清溪深月在諸峯
頂日暮立長江遙看片帆影

汎若耶溪

霽雨牽野情孤舟遂茲賞
積水連遠空落日垂萬象
岸

回雲獨隨山轉泉更響望望極寒源猶言放輕槳

簡長

贈峽山清倫禪師

褰衣汲靈水混滌巾屢塵煙靄霽杉竹澄凝此心神高
僧灑真雨澤彼寒草春華月寫空印清霜肅齋身猶言
振金策歸作耶溪鄰

有朋

天開巖

棲霞山後峯天開一巖秀中有坐禪人形容竹柏瘦飢
餐巖上松渴飲巖下溜愛步巖室前白雲起孤岫

契嵩

感遇四首

海水晦夜清秋色函蓬壺有叟雙龍公鐵網羅珊瑚風
雲浩容與悵恨何所圖欲問天上人可換明月無

仙人白玉京去去何縹緲瓊樓十二層玲瓏汎雲表銀
湟月為波萬頃即池沼秋來宮殿光逗落人間曉空際

時澄明煙霞眇青鳥可見不可到所思空杳杳

天威不到處干戈動邊鄙將軍奮威猛英雄勢隨起紛
紛出榆關肅肅秋色裏白馬冒黃雲清霜厲嚴旨少壯
羽林兒務能莫多喜好武匪君心用兵不得已寄言飛
將軍妙畧應無比志在報君恩豈為黃金死丈夫身許
國慷慨當如此寧教太史書輕笑魯連子

空虛澄遠煙霽色含秋景思君每盤桓駐目千峯頂明
月初團圓可照美人影美人來不來雲霞渺林嶺

湖上晚歸

人間薄游罷歸興尋舊隱春岸行未窮夕陽看欲盡嵐
光山際淡天影水邊近自憐幽趣真清吟更長引

遊大慈山書畫上人壁

谷裏侵雲寺尋幽到深處春過寒花開人謝啼鳥去豈
期草菴客日暮此相遇

道潛

秋日西園四首

日月更代顯光華難並留昔人尚行樂俯仰無暫休平
居得君子出處常相求良辰援余臂共作西園游極目
瞰平野緬然見滄洲千林澹霽色萬韻生涼秋露華溥
菊英靄靄香可揉參差間畦壠芋栗森相儔綠蔓無芳
姿碧花茂牽牛低回矚籬落樹影環清流賞物志已諧
何用登蓬丘

嘗聞晉支遁矯志歸沃洲千載激清風邈哉誰與儔余
今雖不敏萬事非身謀竭來卧窮谷未覺慙先修一法

尚無遣何勞問三休卷舒在至理賞詠歸優游採薇陟
層阿濯足依澗流但驚桂花折詎識江漢秋滄溟空汗
漫無意狎羣鷗

憶昔少壯時意氣摩雲霓游心黃卷間豈顧白日西由
來昧根本旦旦從所迷邇獨悟無為文字如委泥物生
豈高下至道良自齊青山遶我廬開戶衆鳥啼曉日上
喬木林光媚回溪畸人長往來絕壁同攀躋遐天淨若
埽曠目無端倪楚客一何苦登臨獨悽悽

秋山夜來雨雲氣朝尚昏禪庭無來轍但見落葉繁石
室暗燈火天容開霽痕耳目思遠適曠然啟層軒長謠
緩輕策去去窮深源方塘濫清流鳬雁靜不喧時遭羲
皇翁容與諧笑言邈然採真實歲宴誰與倫

次韻黃子理宣德田居四時四首

四序自逶迤田園常局促春陽旋東臯迫我事鉅鎬出
種曝籬根驅牛飲溪曲暉暉明朝陽聒聒喧布穀頽齡
惜筋骸曉睡漫云足蓐食出柴門荷篠赴幽谷蹇條視

柔桑密葉已舒綠今年氣候早膏雨厭厭霖鄰翁時一
來耕耨每相屬

離離小麥黃習習南風度桑棗暗蓬麻耘鉏困朝暮種
瓜屋東隅翠蔓已分布黃花引疎籬冉冉欲橫路白水
漫青秧聯翩下鷗鷺新絲換濁酒有藎羞薄具埽灑聚
比鄰環坐蔭高樹稚子羨羸餘牽衣傍翁嫗牛羊嶺外
歸落日林梢去餉婦亦還家笑言隔煙霧

邨落已徂暑蚊蠅尚喧啾衝門霽朝雨茆竹歸新秋機

絲迫鄰女軋軋無停休
中田藹黃稼爛漫如雲浮
綠蟻釀新甕嘉魴釣清流
瓦尊遲來客禮數忘獻酬
三杯未肯辭笑語方綢繆
時平盜自隱場圃無宵憂
兒孫漸束髮婚嫁迫所謀
欵曲從我言歸途蹇淹留
林端有月色相送前溪頭

朔吹鳴高林回塘冰已結
牛羊卧茅屋原野暗飛雪
壯男臂彫弓短後事田獵
飢鷹一號呼荒徑灑毛血
歸來誇意氣鄰舍呼飲啜
明朝過南山更欲窮窟穴
寒爐然

豆其光燄時起滅布被擁嬌兒從渠踏裏裂老翁寢不寐輾轉念鶩鴨籬居易穿窬狐狸恐驚發

得端叔淮上書

云長淮秋色清曠順風揚舲恨不得與君俱之

飛鴻從西來有客遺我書開緘識遠意字字情有餘報言歷長淮泛泛乘舳艫天開滅遠霧水碧涵空虛超然忘端倪身世疑有無徜徉極幽致恨我失之俱我昔與曾子茲游頗躊躇風高當白帝露冷凋紅蕖扁舟僅半月歷覽窮朝晡伊人亦才華俊逸千里駒結交慕豪彥

個儻非迂儒當時欲相從恨子隔海隅今朝子獨往我
輩還星疎邂逅亦有分夤緣非強圖茫然臨西風俛首
良自吁庶幾有至理去彼形迹拘相望雲漢間皎潔同
蟾蜍

子瞻赴守湖州三首

山煙弄滅沒山木含蔥蒼刺舟傍遙岸理策升虛堂周
遭矚層巘矯矯如翱翔下瞰平田流澹然浮日光青筭
解初箨洗雨聞清香雖云迫前途真賞豈易忘

松門暗朝雨寂歷無行人
隆曦忽穿漏卉木蔚以新
堦泉漱石齒照眼光磷磷
使君美無度卓犖遺囁塵
風標傲竹柏談笑凌穹旻
何愧沉冥子卧霞吞結鄰

揚帆渡江來洗眼驚翠樾
雲姿既容裔鳥哢更清絕
凌梯訪前蹤琬琰亦未滅
嗟我魚目光疇能綴明月
狂墨埽琅玕風煙坐中發
殊勝區中人茫茫走飛轍

與田承君宗丞話舊

赤日下西谷松門斂餘輝
蕭蕭征馬鳴客子來者誰
故

人田子方六月并州歸崎嶇千里道問子來何為君命
不俟駕詎敢辭炎曦神庭梵唄歇軟語同逶迤梧桐挂
涼月清潤含裳衣人生實萍梗同附一渺瀰驚風或暫
先波定還相依昔我在南兗識君英妙時軒軒勇氣節
凜凜如熊羆聲名固已早時命殊淹遲今茲向魏闕驥
足將騰夷聖君隆至治諫諍求瑕疵常聞至人語子可
補拾遺一言開堯聰四海風俗移無為出重失謬謬當
自持贈言古者事吾豈忘前規

廬山雜興七首

衆峯勢連環萬疊不可窮香爐獨秀拔佳氣常蔥蔥長
風卷游霧曉壁開瞳矐招提出其下樓觀排青紅回眸
盼五老刻削金芙蓉宜哉謫仙子愛此巢雲松

白鶴峯後原逶迤曠平陸道周問樵子古實青牛谷披
榛得徑路曳杖驚麋鹿鮑生古騷人曾過鍊師宿明月
古壇邊題詩記脩竹茲焉廢耕隴歲晏空寂粟薄日靜
街山驚湍瀉哀玉回首睇吾廬風幡隔林麓

山南信美矣山北尤增奇春風錦繡谷紅素自相依梯
空上絕巘雲日驚倒窺崖壁暈祥光五色成玻璃旁通
大林寺松竹短且歌樂天當日遊四月桃始披餘齡願
寄此永與世人違

少文好山林每往輒忘歸余生千載後獨與斯人違
來爐峯下結宇聊棲遲長林拱茂木九夏遺炎曦溪雨
晝忽破藤花照清漪黃鸝語深竹可聽不可窺

中巖不知暑但覺晝影長朝來出孤定踽踽行西岡風

泉漱石齒松雨飛蒼蒼猿鳥亦我喜麋鹿還相將喬木
積翠下粲然矚孤芳冉冉抱絕格霏霏浮暗香山祇善
守護每吐雲霧藏寄言樵蘇子慎勿輕摧傷

山深雲物清挹翫洗浮慮昨日行澗南飄然即芒屨風
潭耿危約晚與樵爭渡隔水認梅花方驚歲華暮幽人
渺江海樂事期誰預山月獨多情娟娟遲歸路

高巖吐奇雲倏忽千萬丈援毫欲名貌卷縮非一狀飛
仙或遨遊隱隱出其上驚飈忽吹滅轉盼惟清嶂山中

勝事多彼俗誰能亮

清順

竹徑偶題

久從林下遊頗識林下趣縱渠綠陰繁不礙清風度閒
來石上眠落葉不知數一鳥忽飛來啼破幽絕處

慧詮

梵天寺晚歸

落日寒蟬鳴獨歸林下寺柴扉應未掩片月隨行屨唯

聞犬吠聲又入青蘿去

僧字

師利上人喜作豔詞以詩箴之

大道久凌遲正風還彫隳無人整頽綱目亂空傷悲卓
有出世士蔚為人天師文章通造化動與王公知囊括
十洲香名翼四海馳肆意放山水灑脫無羈縻雲輕三
事袖餅錫天下之詩曲相間作百紙頃刻為藻思洪泉
瀉翰墨清且奇惜哉大手筆胡為弄柔詞願師持此才

奮起革澆漓驚彼東山嵩圖祖進豐碑再續輔教編高
步凌丹墀他日僧史上萬世為著龜迦葉聞琴舞終被
習氣隨伊余浮薄人贈言增忸怩倘能循我言佛日重
光離

惠洪

居上人自雲居來訪白蓮社話明日告歸作此
送之

浮雲山盡際花木迎春暉佳人殊方來見之消渴飢藉

草坐松影粉香時落衣氣貌秀可掬出語超幽微巖壁
鐘聲寂山陰花發稀去袂挽莫留又作甌峯歸

觀山茶過回龍寺示邦基

北窗賞新晴睡美正清熟竹雞斷幽夢朦朧不能續卧
聞故人家山茶已出屋欣然一命駕妍暖快僮僕千朶
鶴頂紅染此一叢綠坐客例能詩秀句抵金玉攜過回
龍寺埽壁為君錄逸筆作波險歌斜不可讀坐驚殷牀
鐘暮色眩雙目入關更清興市井亂燈燭人生分萬途

稱心良易足時平且行樂餘賓非所欲

追和帛道猷

永懷山陰老漱流味餘津幽尋見蘭叢蒼然出荆榛便
欲即之語忘其千歲人歸休正吾志理順如析薪夜春
博飯喫猶勝海南民

初到鹿門上莊見燈禪師遂同宿愛其體物欲
託跡以避世戲作此詩

上莊俯漢江古木雜桑柘槐衙陰廣陌麥浪漲平野連

雲對困廩用谷量牛馬我來二月破解鞍綠陰下縱望
煙霏中領畧見楯瓦耆年骨柴崖迎客意傾寫干戈爭
奪餘身在相驚詫山空啼杜鵑龕燈自清夜斂眉問儂
州亟口談江夏以余遊二公老大知識寡暮歸逢醉人
往往遭捶罵鹿門有餘地賢矧如君者為連修竹林規
以構茅舍伏春舊所能犁鋤當學把相見水過膝蓑笠
清入畫

送人

相送復相別不異雲間月無心去復來有魄圓還缺此
別興何如西風秋月初暮鴻千里至能寄八行書

如璧

為謝無逸賦陳氏貫時軒

西園拱羣木嚴霜損天和豈不惜嘉陰奈此風雨何青
青繫此君凡材不同科君知不同科何必葉與柯試看
一尺根節已倍身多故令卷籜中高韻不可摩陳侯定
可入厚禮為君羅視此種竹心知君減悲歌吾徒涉世

疎投足得詆訶何如雪月際對君自婆婆娑但無我履聲
與子相經過

雨小霽登南寺閣

登樓望四垂縮縮雨小休老木藤蔓活古殿金碧流浮
雲捲豈盡落日不可留無人相與語鸚鵡漫啾啾

韻酬潘庭立儀曹見贈之什

安仁可獨來連璧豈易得我老閱士久此士秀江國不
窺董生園頗割子魚席向來決勝地璧水湛寒碧幾年

富問學一道貫儒釋捉塵初不譁論正語明白哦詩吐
嗟辦妙韻出金石吾家妙喜師賞歎節屢擊夜堂明月
冷鼎足坐禪寂他年山中人盛事話疇昔

祖可

天台中偶題

偃步入蘿徑綿延趣深僧居不知處彷彿清磬音石
梁邀屢度始見青松林谷口未斜日數峯生夕陰淒風
薄喬木萬竅作龍吟摩挲綠苔石書此慰幽尋

斯植

與子入山來

與子入山來永夜不得睡但聞松子聲
敲落梧桐樹月到窗愈明秋風瀉流水
古琴三兩絃知音不知處惟有白面猿
閒中自來去

永頤

食新茶

自向山中來泉石足幽弄茶經猶挂壁
庭草積已衆拜

先俄食新香凝雲乳動心開神宇泰境豁謝幽夢至味
延冥遐靈爽脫塵鞅靜語生雲雷逸想超鸞鳳飽此巖
壑真清風願遐送

感雁來紅

落落雲中雁亭亭堦下草草心將變紅雁聲來已早霜
風日夜催對此忘吾老玲瓏葉數層次第顏色好燕脂
染盡時倚欄如醉倒年年秋雁來每被吟情惱

秋館

林暑漸消歇爽氣浮高松風蟬有遺響露花結秋紅微
月出東嶺碧雲散遐穹暮館正虛寂泉聲雜鳴蟲

寄鳳山滿上人

空生久不來端居常掩室緬懷舊林社泉壑翳清密古
鳳閱靈音野竹無花實動植皆營營忘言消永日

雲松

桐花

亭亭南軒外貞幹脩且直廣葉結青陰繁花連素色天

資韶雅性不愧知音識

李清照

曉夢

曉夢隨疎鐘飄然躡雲霞因緣安期生邂逅萼綠華秋
風正無賴吹盡玉井花共看藕如船同食棗如瓜翩翩
坐上客意妙語亦佳嘲辭鬪詭辨活火分新茶雖非助
帝功其樂何莫涯人生能如此何必歸故家起來斂衣
坐掩耳厭喧譁心知不可見念念猶咨嗟

韓玉父

題漠口舖

南行踰萬山復入武陽路黎明與雞興理髮漠口舖盱
江在何所極目煙水暮生平良自珍羞為浪子婦知君
非秋胡強顏且西去

御選宋詩卷二十四

欽定四庫全書薈要卷一萬八千三百三十二

集部

御選宋詩卷二十五

七言古詩一

田錫

御溝

春半桃花水初下一溝澄綠光如砑夾道官城數里中
靜聽潺湲明月夜千門萬戶建章宮金鑠橫門溝暗通
三月花飛若零雨水流何處咽香紅

送春

花霏霏柳依依留春不住送春歸
春歸何處堪圖畫
春盡江南日暮時
黃鸝啼多芳草遠
青梅子重楊花飛
人生三萬六千日
與君復有明年期

風箏

白蘋洲暖春風生
畫樓檻迥銀箏鳴
鏗鏘節奏急復慢
空中一部天樂聲
三十六宮深窈窕
繡楣藻井光相照
十三弦上千般聲
朝靄微吟暮煙嘯
夜來親奉月中聞

繁弦促節何紛紜碎如鸞鈴與珂珮巫山隊仗迎湘君

晚來金屋愁微雨風細箏聲不全舉依稀嬪妾怕人知

啾啾切切私相語洪纖斷續何所拘鳳凰對著飛鸞孤

梧桐枝邊泊未穩琅玕節上鳴相呼有時方奏俄中絕

宮商斗頓如刀截杏花露重鴛鴦寒空見如霜滿庭月

有時半日全無風一一暮天樓閣紅唯聞鳥雀啄弦上

暖珠寒玉何玲瓏清音朝朝與暮暮誤聲不管周郎顧

祇嫌雅鄭交奏時寶鐸丁東暗相妬

張詠

寄程說傳逸人

綠楊陰陰長楸道桃李初飛紅杏小手浮大白口談天
得意相歡不知老一從召入金馬門三載長纓事邊徼
幾欲含毫寄別離悠悠亂思如芳草

寄晁同年

昔同白日昇穹碧還同水國司民籍三年不見頻寄書
兩月相過忘行役桃花江上雪霏霏黃鶴樓中風力微

幽勝逼人魂欲飛此時不醉無與歸人間美事應有主
別馬蹄霜邊塞土高樓一望心淒迷昨夜疎簷滴寒雨
休誇筆力敵真風勿憶雲山千萬重但遇西風一行雁
殺青相問莫辭慵

王禹偁

應制皇帝親試貢士詩

天王出震寰海清魁星燦燦昭文明詔會郡國多貢士
大張珠網羅羣英皇情孜孜終不倦日斜猶御金鑾殿

宮柳低籠三月煙
爐香飛入千人硯
麻衣皎皎光如雪
一一重瞳賞鑒別
孤雲得路荷君恩
聚首唯言盡臣節
小臣蹤跡本塵泥
登科曾賦御前題
屈指方今五六載
如今已上青雲梯
位列諫官無一語
自問將何報明主
應制非才但淚垂
強作登歌歌舜禹

楊億

禁直

鳳樓鴛瓦蟾波溼
衆籟聲沉百蟲蟄
仙盤雲表露成霜

何人夜半牛衣泣，芝泥香熟封詔書。
河漢西傾移斗車，陰風撼撼起庭樹。
寒澌戛戛鳴宮渠，千廬迭唱傳宵警。
海山鼇背蓬壺頂，金釭珠網結綺錢。
玉井銀牀垂素綆，前席受釐詢碩生。
觀書百斤須中程，投籤乍應嚴鼓節。
求衣誤聽蒼蠅聲，渴烏漏盡繁星曙。
魚鑰建章開萬戶，初日瞳矓豔屋梁。
鳴鞭一聲下天路。

魏野

太陽津渡

數點歸鴉啼遠樹人行欲盡斜陽路暮靄還生竹塢邨
西風乍起茅津渡顚卽三兩待船人立蹇扶筇望水濱
忽見蘆中煙一縷祇應炊稻烹霜鱗

韓琦

答孫植太博後園宴射

花梢點紅芽綠茁宴亭爽塼堦雲列呼賓習射次序升
體裁人人矜勇挫六鈞力副百中藝由基注目老羿拽
支左屈右何太工象弭急收如列缺須臾一鏑入鵠心

畫鼓連轟盡聲喝後者審固意愈精有時大呼劈箭筈
惜哉最是毫釐差采侯似動筈微撇分明角勝各記暈
將終或為一箭奪當筵主籌令難犯大白時舉出正罰
此禮自古尤所重矍圃去留宜有別五善大抵主和容
不止穿楊與穿札因憶當年黠羌叛非才誤授將軍鉞
帳下貔貅十萬師力過生犀心似鐵大仁未許覆元巢
飭謹封陞禦侵越悍夫猛士志待騁貯填憤氣何由洩
正值高秋天氣寒塞場霜重嚴風刮約束偏裨整隊兵

旌旗爍電戈矛雪驅出長郊閱奇陣離合應麾皆有節
次引精銳較絕技控弦命中無虛發氣豪馬健走危坡
直下千尋未嘗蹙收軍校獵圍平原犬順人呼鷹解絀
山麋衝軼犯勁矢崗兔奔跳迷狡穴大鵬盤空不輕搏
老狐仰視肝膽裂駐鞍賞獲犒部曲浪瀉酒車輪染血
將軍未酣衆心醉耳後風生鼻頭熱此日淮藩奉寬詔
朱輪慢碾行春轍鈴索聲沉訟牒稀優游大司養疎拙
斜蒿青青鱸膾新公醪香重醅才撥射堂對客且相娛

不妨樂事陶嘉月襟懷聊與水雲閒夢魂猶寄關山潤
逢辰未立赫然勲破的求功真瑣屑欲得心如外貌歡
報國之誠盡攄豁

廣陵大雪

淮南常歲冬猶燠今年陰沴何嚴酷黑雲漫天一月昏
大雪飛揚平壓屋風力軒號助其勢擺撼琳琅摧凍木
通宵徹晝不暫停堆積樓臺滿溪谷有時造出可憐態
柳絮梨花亂紛撲乘溫變化雨聲來度日堦庭恣淋漓

幾紫寒霰不成絲
驟集疎簷還掛瀑
蟄蛙得意欲跳擲
幽鷺無情成挫辱
曾魚江叟冰透簑
賣炭野翁泥沒輻
閭閻細民誠可哀
三市不喧游手束
牛衣破解突無煙
餓犬聲微饑子哭
我聞上天主時澤
亦有常數滋農穀
膏潤均於一歲中
是謂年豐調玉燭
此來盛冬過爾多
却慮麥秋欠霑足
太平憂民仰天祝
願噓氛霾看晴旭
望晴不晴無奈何
擁被醉眠頭更縮

和袁陟節推龍興寺芍藥

廣陵芍藥真奇美名與洛花相上下洛花年來品格卑
所在隨人趨高價接頭著處騁新妍輕去本根無顧藉
不論姚花與魏花只供俗目陪妖姹廣陵之花性絕高
得地不移歸造化大豪大力或強遷費盡擁培無豔冶
東君固是花之主千苞萬萼從榮謝似矯東君汎愛心
枉殺春風不肯嫁遂令天下走香名髣髴丹青競誇詫
以此揚花較洛花自合揚花推定霸其間絕色可粗陳
天工著意誠堪訝仙家冠子鏤紅雲金線妝治無匹亞

旋心體弱不勝枝寶髻歌斜猶墮馬冰雪肌膚一纈斑
新試守宮明似赭雙頭兩兩最多情象物更呈鞍面窠
樓子亭亭欠姿媚特有怪狀堪圖寫見者方知畫不真
未見直疑傳者詐前賢大欲巧賦詠片言未出心先怕
天上人間少其比不似餘芳資假借我來淮海涉三春
三訪龍興舊僧舍問得龍興好事僧每歲看承不敢暇
後園栽植雖甚蕃及見花成由取捨出羣標致必驚人
方徙矮壇臨大廈客來只見軒檻前國豔天姿相照射

因知靈種本自然須憑精識能陶冶君子果有育材心
請視維揚種花者

後園寒步

如何天地舉寒令獨將殺氣凌邊遐公園跬步亦難往
試來舉目成吁嗟長空黯澹作愁色日光似透雲還遮
朔風刮面不吹雪徒擾萬竅掀黃沙園中索莫不可狀
唯視衆木攢枯槎如有漢將肅行陣遠涉大漠平番家
鵝雛凍列樹營壁巨矛長戟何交加老樹一二柯葉在

外皮皴裂埋殭蛇幽禽聲好久絕聽孤城遠近號饑鴉
齋中酒熟忍自酌幾何貧戶無纖麻冥官持權用意惡
直欲萬類殲陰邪窮嚴極烈勢未已不知泉底生陽芽

臘日出獵近郊

悲風吼林霜草白殺氣稜稜慘空碧因畋講事此其時
况值嘉平農已隙暫整和門出近郊獵獵旌旗原燒赤
狩場一望天四垂貌虎意豪猶恨窄鼓動圍開翼復箕
人知部分如刀劃飛走竄伏不得暇狡兔幸生徒奮擲

饑鷹眼捷翅頭健下韝風發無虛搨鵲拳交擊或未仆
繼族韓盧追以咋忽穿叢薄失所捕旺焉便縱摩霄翮
不似寒鴟得腐鼠傲然直視鵷雛嚇烏鵲鵲雉曷足數
亦有晨風競搜索其間駭獸欲凌突悍卒爭趨矜手格
前驅反旆弗及舍丘山大委虞中獲翻車瀉酒犒士衆
萬刀剗肉恣燔炙塞防寓令宣徒然不在詩人刺荒癖
王者設官猶取衆大奸宿猾許擒扼乘時廢職莫自効
勿謂鷙鳥無全策別有老狐智計巧只就高城營窟宅

疑冰識扱行步穩此日何由見蹤跡鵬兮鵬兮未得志
將軍憤懣如何釋

答章望之祕校惠詩求古瓦硯

魏宮之廢知幾春其間萬事成埃塵唯有昭陽殿瓦不
可壞埋沒曠野迷荒榛陶甄之法世莫得但貴美璞踰
方珉數百年來取為硯墨光爛發波成輪求之日盛得
日少片材無異圭璧珍巧工近歲知衆寶雜以假偽窺
錢緡頭方面凸概難別千百未有三真我來本邦責

鄴令朝搜暮索勞精神遺基壤地徧剝窟始獲一瓦全
元淳鮮斑著骨尚乾翠夜雨點漬痕如新當時此復近
簷溜印以篆字花其脣磨礱累日喜成就要完舊質知
無倫吾才寡陋不足稱思與好古能文人好古能文今
者誰武寧祕書章表民無詩尚欲兩手拊何況大雅之
奏聞鏗純

觀胡九齡員外畫牛

丹青之筆奪造化能者幾何登品錄蛟龍獍惡鬼神怒

更工不接時人目有形之物至者稀是否難欺衆所矚
絳臺胡掾文章外偏向畫牛其好酷海內馳名三十年
得者珍藏過金玉老來纔始著青衫養親不及朝家祿
前日野服忽相過云訪恩知走京轂微風入指未能畫
示我蠟本數十幅採撫諸家百餘狀毫端古意多含蓄
鬪者取力全在角臥者稱身全在腹立者髣髴精神慢
背者分數頭項促行者動作皆得羣乳者顧視真憐犢
當流汨戲益自在欲渡或疑猶蓄縮從容飲嚙得天真

荷鞭時有童兒牧或橫一笛坐牛背便是無聲太平曲
江天雨雪易溟濛風勢掀號摧古木欹斜簑笠趁牛歸
蕭疎暮景煙邨宿奇哉胡掾老筆不可到戴叟重生須
死伏吾觀諸牛之態雖盡妙尚有所遺思未熟牛於民
生功最大不畫牛功牛亦辱胡君胡君聽我言別選輕
綃成巨軸寫出區區耒耜勤使知天下由我食方足

醉白堂

顛老新成池上堂因憶樂天池上篇樂天先識勇退早

凜凜萬世清風傳古人中求尚難擬自顧愚者孰可肩
但舉當時池上物媿今之有殊未全池東無廩貯餘粟
池西無亭揮五絃中無高橋跨三島下壓鼇背浮清漣
其間合奏散序者童妓百指皆嬋娟平無三石展湘簟
靜無雙鶴翹丁仙雅無吳郡青版舫游泛安便牢且堅
吾今謀退亦易足池南大屋藏羣編一車豈若萬籍富
子孫得以精覃研夾堂脩竹抱幽翠森森擁檻竿逾千
池中所出粗可愛芡盤菱角紅白蓮芍藥多名來江都

牡丹絕豔移洛川及時花發池左右香苞爛染朝霞鮮
薌老於此興不淺間會賓屬陳芳筵妖妍姬侍目嘉卉
咿啞絲竹聽流泉宜城釀法亦云美詩酒僅可追前賢
狂吟氣健薄霄漢豪飲體放忘貂蟬酒酣陶陶睡席上
醉鄉何有但浩然人生所適貴自適斯適豈異白樂天
未能得謝已如此得謝吾樂知誰先

范仲淹

中元夜百花洲作

南陽太守清狂發未到中秋先賞月
百花洲裏夜忘歸
綠梧無聲露光滑
天學碧海吐明珠
寒輝射空星斗疎
西樓下看人間世
瑩然都在青玉壺
從來酷暑不可避
今夕涼生豈天意
一笛吹銷萬里雲
主人高歌客大醉
客醉起舞逐我歌
弗歌弗舞如老何

依韻答賈黯監丞賀雪

今之刺史古諸侯
孰敢不分天子憂
自秋徂冬渴雨雪
旬奏空文慙傳郵
得非郡國政未洽
刺史閉閣當自尤

上賴天子仁且聖神龍奔走不俟求同雲千里結雪意

一夕密下誠如羞

俗有雪羞多夜落之句

曉來賞心江海上東望

不見三神丘揮祛厲氣發和氣明年黍稷須盈疇煙郊
空濶獵者健酒市暖熟沾人稠光精燦燦奪劍戟清寒
拂拂生衣裘鈴齋賀客有喜色飲酣歌作擊前籌常願
帝力及南畝盡使風俗如東鄒誰言吾子青春者意在
生民先發謳

依韻和提刑太博嘉雪

南陽風俗常苦耕太守憂民敢不誠
今秋與冬數月旱
二麥無望愁編氓龍遁雲藏不肯起
荒祠巫鼓徒轟轟
昨宵天意驟回復繁陰一片飄寒瑛
裁花片片盡六出
化工造物何其精散亂狂飛若倚勢
徘徊宛舞如含情
千門競掃明月色萬木都坼寒梅英
天上風流忽爾在
人間險阻無不平因松偶作琴瑟調
過竹徐聞環珮聲
江天鳴雁畏相失龍庭奔馬豪如驚
丞相沙堤初踏練
將軍紫髯渾綴纓崖前饑煞嘯風虎
海上凍死吞舟鯨

我有高樓擘雲上雙瞳一開千里明羣閭逐去疫厲遠
長遶壓下塵埃清當知有年可坐致東臯父老休營營
因招大使賞天瑞醉把義皇向上評窮通得喪了無事
莊老器宇何難并君起作歌我起和天地和氣須充盈
當年此樂不可得與雪對舞攄平生共君學取雪好處
平施萬物如權衡

文彥博

寄贈華清觀大師

五城三洞朝真客紫房名隸神仙籍玉案晨餐沆瀣精
椒庭夜飲流霞液姑山綽約冰雪容亭亭霞外脫塵蹤
飈馭狂遊紫貝閣雲裝醉入白銀宮想陪桂父與金母
崑蓬春賞蟠桃紅愚亦放懷隨淡泊採芝茹朮希彭朔
常祕六泥東竈丹每求五色西山藥紫臺久判浮丘袂
錦川繡嶺三千里羽駕鸞驂未載逢經年望斷函關氣

過燕川渡

燕川東北孔山西借車直渡馬頭溪

退之詩云馬頭溪深不可屬借車載

過水
入箱

農樵引路津不迷行行引上青雲梯回頭下視林
木低谷風泠泠山鳥啼岩隈泉甘土仍肥昔人於斯卜
幽棲春深芝朮生新美采芝茹朮希夷齊諸公共游不
知疲長吟吐氣如虹蜺水濱石上寫此詩手拭蒼苔脚
踏泥冒寒履險不憚辭勉欲繼踵前賢題

余靖

代贈

幽房寂寞時香散輕袿衣可憐夜永不成寐苦恨春殘

猶未歸歸時一見伸修眉寶柱新聲逐調移多少相思
說不盡淚滿玉壺看自知

趙抃

訪何若谷

君愛仙源壓塵俗高樓對起闌干曲朝霞灼灼浮晴暉
二十四峯照羣玉樓下長江煙水綠樓前有瀨歸艎促
主人借問何時還回首崢嶸看不足

順風呈范御史

濠州抵泗里數百長淮波平曉如席鳴輦解繹楊柳堤
畫船中有東吳客君恩得請許歸去聊治里閭去咫尺
歲窮天遠心欲飛念之汲汲事行役豁如天意適吾願
號令西北起風伯初時淅淅似鼓動布帆尚留十幅窄
孤檣得勢安以平中流激箭巨浪劈篙橫櫓閣力不用
疾若鷺隼增羽翮瞥然兩眼瞬霎過木葉馳黃山走碧
擎舟月餘今日快一樽自歌兩手拍樽中酒空不自歌
順風好景如之何毘陵太守同此樂為言無惜新詩多

石介

聞子規

月上半峯峯樹碧子規啼苦月無色壯士耳邊都不聞
兒女眼中淚自滴古人出處非關身處今事親出事君
服勤至死不敢倦避勞擇逸無所聞我看蜀道誠為難
嗟爾子規何云云王尊九折竟叱馭班超萬里圖立勲
乘危蹈險盡臣節二人至今揚清芬我本魯國一男子
少小氣志凌浮雲精誠許國貫白日有心致主為華勲

位卑身賤難自達滿腹帝典與皇墳有時憤懣吐一言
小人謗議已紛紛宰相寬容天子慈八年之中三從軍
從軍官清我何苦嘉州路遠爾勿語地不為我易其險
我豈守道不能固子規子規漫啼絕斷無清淚灑向汝
送范署赴天雄李太尉辟命二首

我家泰山徂徠間濃嵐潑翠粘衣冠君來訪我茅屋下
正值山色含春寒終日把酒對山坐幾片山色落酒盤
峯頭空好望無倦筍裏酒多傾不乾臨行再拜殷勤別

請我一言披心肝吾貧無錢以贈君門前峨峨橫兩山
願君節似兩山高眼看富貴如鴻毛

伯樂之廐無駑駘豫章之林多瑰材相君新坐碧油幢
之子直上黃金臺秋風蕭蕭動笳鼓落葉撼撼鳴鐃鑿
將軍手持十萬騎陣前號令如疾雷從事借籌為決勝
運於掌上何恢恢蠢茲元昊命螻蟻西師堂堂難當哉
况我賢相賢從事北門無憂宜大開

何郊

益州州學聖訓堂詩

益為藩捍西南隅物衆地大稱名都擇守來頒茲土政
治人頗與他邦殊差跌一有戾條教便宜皆得行黥誅
羣姦帖息不敢動無復弄兵覲穿窬任威或謂一時事
立政恐非長世圖豈無達識究是否重在改作徒嗟呼
仲翁文翁字喬孫有偉度敢決不以常文拘當官勇欲除
弊法伊憂內惻仁心孚視人無異遠方意威行惠政還
相須始時歲荒力賑救坐使餓殍成完膚既而為俗思

根本其在立學陳師模大開儒庠務誨導秀民聳慕紛
來趨遂言謂署鴻生職使演經傳傳諸徒奏函一上聞
法座詔劄即日來諧俞詔云信汝辦治蜀緩任威罰先
文儒公心感激侈上賜刻在金石尊神謨覆之大厦勝
美稱日久傳著期無渝邦人承風為盛事觀者填道來
于于吁嗟多士其聽命勿即邪徑安夷塗師無訛聖生
率教信尚姬孔尊唐虞施之鄉邦勵雅俗仁誼得以相
持扶漢皇初始盛文學起自蜀國行中區本朝教化視

三代建元安可為齊驅吾君訓辭諭萬里義均盤誥茲
宣敷吾守教本樹一國學盛洙泗相涵濡臣謀君從協
大義聖哲倡和真同符欲歌盛節示萬古才不逮志嗟
其愚

歐陽修

三遊洞

漾檝泝清川捨舟緣翠嶺探竒冒層嶮因以窮人境弄
舟終日愛雲山徒在青蒼杳靄間誰知一室煙霞裏乳

竇雲腴凝石髓蒼崖一徑橫查渡翠壁千尋當戶起昔
人心賞為誰留人去山阿跡更幽青蘿綠桂何岑寂山
鳥嘒嘒不驚客松鳴澗底自生風月出林間來照席仙
境難尋復易迷山回路轉幾人知惟應洞口春花落流
出巖前百丈谿

即下牢
溪也

黃牛峽祠

大川雖有神淫祀亦其俗石馬繫祠門山鵝噪叢木潭
潭邨鼓隔溪聞楚巫歌舞送迎神畫船百丈山前路上

灘下峽長來去江水東流不暫停黃牛千古長如故峽
山侵天起青嶂崖崩路絕無由上黃牛不下江頭飲行
人惟向舟中望朝朝暮暮見黃牛徒使行人過此愁山
高更遠望猶見不是黃牛滯客舟

語曰朝見黃牛暮見黃牛一朝一暮黃牛

如故言江惡難行久不能過也

千葉紅梨花

峽州署中舊有此花前無賞者知郡朱郎中始加欄檻命座客賦之

紅梨花千葉愛者誰白髮郎官心好奇徘徊繞樹不忍折
一日千匝看無時夷陵寂寞千山裏地遠氣偏時節異

愁煙苦霧少芳菲
野卉蠻花鬪紅紫
可憐此樹生此處
高枝絕豔無人顧
春風吹落復吹開
山鳥飛來自飛去
根盤樹老幾經春
真賞今纔遇使君
風輕絳雪樽前舞
日暖繁香露下聞
從來奇物產天涯
安得移根植帝家
猶勝張騫為漢使
辛勤西域徙榴花

聖俞會飲

時聖俞
赴湖州

傾壺豈徒強君飲
解帶且欲留君談
洛陽舊友一時散
十年會合無二三
京師旱久塵土熱
忽值晚雨涼纖纖

滑公井泉釀最美赤泥印酒新開緘更吟君句勝啖肉
杏花妍媚春酣酣吾交豪俊天下選誰得衆美如君兼
詩工鑱刻露天骨將論縱橫輕玉鈐遺編最愛孫武說
往往曹杜遭夷芟關西幕府不能辟隴山敗將死可慙
嗟予身賤不敢薦四十白髮猶青衫吳興太守詩亦好
往奏玉管和英咸盃行到手莫辭醉明日舉棹天東南

晉祠

古城南出十里間鳴渠夾路何潺潺行人望祠下馬謁

退即祠下窺水源
地靈草木得餘潤
鬱鬱古栢含蒼煙
并兒自古重豪俠
戰爭五代幾百年
天開地闢真主出
猶須再駕方凱旋
頑民盡遷高壘削
秋草自綠埋空垣
并人昔遊晉水上
清鏡照耀涵朱顏
晉水今入并州裏
稻花漠漠澆平田
廢興彷彿無舊老
氣象寂寞餘山川
惟存祖宗聖功業
干戈象舞被管絃
我來覽登為歎息
暫照白髮臨清泉
鳥啼人去廟門闔
還有山月來娟娟

鎮陽殘杏

鎮陽二月春苦寒東風力弱冰雪頑北潭跬步病不到
何暇騎馬尋郊原鵬丘新晴暖已動砌下流水來潺潺
但聞簷間鳥語變不覺桃杏開已闌人生一世浪自苦
盛衰桃杏開落間西亭昨日偶獨到猶有一樹當南軒
殘芳爛熳看更好皓若春雪團枝繁無風已恐自零落
長條可愛不可攀猶堪攜酒醉其下誰肯伴我顏巾冠
初伏日招王幾道小飲

北園數畝官牆下嗟我官居如傳舍潯沲北渡馬踏水

西山病歸花已謝落英不見空繞樹細草初長猶可藉
空園一鎖不復窺不覺芳溪繁早夏隔牆時時聞好鳥
如得嘉客聽清話今朝試去繞園尋綠李橫枝礙行馬
蒲萄憶見初引蔓翠葉陰陰還滿架紅榴最晚子已繁
猶有殘花藏葉罅人生有酒復何求官事無了須偷暇
古云伏日當早歸況今著令許休假能來解帶相就飲
為子掃月開風榭

啼鳥

窮山候至陽氣生百物如與時節爭官居荒涼草樹密
撩亂紅紫開繁英花深葉暗耀朝日日暖衆鳥皆嚶鳴
鳥言我豈解爾意綿蠻但愛聲可聽南窗睡多春正美
百舌未曉催天明黃鸝顏色已可愛舌端啞咤如嬌嬰
竹林靜啼青竹笋深處不見唯聞聲陂田繞郭白水滿
戴勝穀穀催春耕誰謂鳴鳩拙無用雌雄各自知陰晴
雨聲蕭蕭泥滑滑草深苔綠無人行獨有花上提葫蘆
勸我沽酒花前傾其餘百種各嘲咍異鄉殊俗難知名

我遭讒口身落此每聞巧舌宜可憎春到山城苦寂寞
把盞常恨無娉婷花開鳥語輒自醉醉與花鳥為交朋
花能嫣然顧我笑鳥勸我飲非無情身閒酒美惜光景
惟恐鳥散花飄零可笑靈均楚澤畔離騷憔悴愁獨醒
寄題子美滄浪亭

子美寄我滄浪吟邀我共作滄浪篇滄浪有景不可到
使我東望心悠然荒灣野水氣象古高林翠阜相回環
新篁抽筍添夏影老枿亂發爭春妍水禽閒暇事高格

山鳥日夕相啾喧不知此地幾興廢仰視喬木皆蒼煙
堪嗟人跡到不遠雖有來路曾無緣窮奇極怪誰似子
搜索幽隱探神仙初尋一徑入蒙密豁目異境無窮邊
風高月白最宜夜一片瑩淨鋪瓊田清光不辨水與月
但見空碧涵漪漣清風明月本無價可惜祇賣四萬錢
又疑此境天乞與壯士憔悴天應憐鵠夷古亦有獨往
江湖波濤渺翻天崎嶇世路欲脫去反以身試蛟龍淵
豈如扁舟任飄兀紅蕖綠浪搖醉眠丈夫身在豈長棄

新詩美酒聊窮年雖然不許俗客到莫惜佳句人間傳

菱溪大石

新霜夜落秋水淺有石露出寒溪根苔昏土蝕禽鳥啄
出沒溪水秋復春溪邊老翁生長見疑我來視何殷勤
愛之遠徙向幽谷曳以三犢載兩輪行穿城中罷市看
但驚可怪誰復珍荒煙野草埋沒久洗以石竇清泠泉
朱欄綠竹相掩映選致佳處當南軒南軒旁列千萬峰
曾未有此奇嶙峋乃知異物世所少萬金爭買傳幾人

山河百戰變陵谷何為落彼荒溪瀆山經地誌不可究
遂令異說爭紛紜皆云女媧初鍛鍊融結一氣凝精純
仰視蒼蒼補其缺染此紺碧瑩且溫或疑古者燧人氏
鑽以出火為炮燔苟非神聖親手跡不爾孔竅誰雕刻
又云漢使把漢節西北萬里窮崑崙行經于闐得寶玉
流入中國隨河源沙磨水激自穿穴所以鐫鑿無瑕痕
嗟余有口莫能辨歎息但以兩手捫盧仝韓愈不在世
彈壓百怪無雄文爭奇鬪異各取勝遂至荒誕無根原

天高地厚靡不有醜好萬狀奚足論惟當掃雪席其側
日與嘉客陳清樽

豐樂亭小飲

造化無情不擇物春色亦到深山中
山桃溪杏少意思自趁時節開春風
看花遊女不知醜古妝野態爭花紅
人生行樂在勉強有酒莫負瑠璃鍾
主人勿笑花與女嗟爾自是花前翁

四月九日幽谷見緋桃盛開

經年種花滿幽谷花開不暇把一卮人生此事尚難必
况欲功名書鼎彝深紅淺紫看雖好顏色不耐東風吹
緋桃一樹獨後發意若待我留芳菲清香嫩蕊含不吐
日日怪我來何遲無情草木不解語向我有意偏依依
羣芳落盡始爛熳榮枯不與衆豔隨念花意厚何以報
惟有醉倒花東西盛開比落猶數日清罇尚可三四攜

鸚鵡螺

大哉滄海何茫茫天地百寶皆中藏牙鬚甲角爭光鉉

腥風怪雨灑幽荒
珊瑚玲瓏巧綴裝
珠宮貝闕爛煌煌
泥居殼屋細莫詳
紅螺行沙夜生光
負材自累遭剗腸
匹夫懷璧古所傷
濃沙剝蝕隱文章
磨以玉粉緣金黃
清罇旨酒列華堂
隴鳥回頭思故鄉
美人清歌蛾眉揚
一醕凜冽回春陽
物雖微遠用則彰
一螺千金價誰量
豈若泥下追含漿

送徐生之澠池

河南地望雄西京
相公好賢天下稱
吹噓死灰生氣燄

談笑暖律回嚴凝曾陪樽俎被顧盼羅列臺閣皆名卿
徐生南國後來秀得官古縣依峭陵脚靴手板實卑賤
賢俊未可吏事繩攜文百篇赴知己西望未到氣已增
我昔初官便伊洛當時意氣尤驕矜主人樂士喜文學
幕府最盛多交朋園林相映花百種都邑四顧山千層
朝行綠槐聽流水夜飲翠幙張紅燈爾來飄流二十載
髣髴蕭索垂霜冰同時並遊在者幾舊事欲說無人應
文章無用等畫虎名譽過耳如飛蠅榮華萬事不入眼

憂患百慮來填膺羨子年少正得路有如扶桑初日昇
名高場屋已得雋世有龍門今復登出門相送親與友
何異籬鷓鴣瞻雲鵬嗟我筆硯久已格感激短章因子興

鷓鴣詞

效王建作

龍樓鳳闕鬱崢嶸深宮不聞更漏聲紅紗蠟燭愁夜短
綠窗鴨鵝催天明一聲兩聲人漸起金井轆轤聞汲水
三聲四聲促嚴妝紅靴玉帶奉君王萬年枝軟風露濕
上下枝間聲轉急南衙促仗三衛列九門放鑰千官入

重城禁籞鎖池臺此鳥飛從何處來君不見潁河東岸

邙陂濶山禽野鳥常嘲啗田家惟聽夏鷄聲

鷄鵲京西邙人謂之

夏鷄夜夜壠頭耕曉月可憐此樂吾獨知春戀君恩今白

髮

贈沈遵

并序

予昔於滁州作醉翁亭於琅琊山有記刻石往往
傳人間太常博士沈遵好奇之士也聞而往遊焉
愛其山水歸而以琴寫之作醉翁吟一調惜不以

傳人者五六年矣去冬予奉使契丹沈君會予恩
翼之間夜闌酒半出琴而作之予既嘉客之好尚
又愛其琴聲乃作歌以贈之

羣動夜息浮雲陰沈夫子彈醉翁吟醉翁吟以我名我
初聞之喜且驚宮聲三疊何泠泠酒行暫止四座傾有
如風輕日暖好鳥語夜靜山響春泉鳴坐思千巖萬壑
醉眠處寫君三尺膝上橫沈夫子恨君不為醉翁客不
見翁醉山間亭翁歡不待絲與竹把酒終日聽泉聲有

時醉倒枕谿石青山白雲為枕屏花間百鳥喚不覺日
落山風吹自醒我時四十猶強力自號醉翁聊戲客爾
來憂患十年間鬢髮未老嗟先白滁人思我雖未忘見
我今應不能識沈夫子愛君一罇復一琴萬事不可干
其心自非曾是醉翁客莫向俗耳求知音

於劉功曹家見楊直講褒女奴彈琵琶戲作呈
聖俞

大弦聲遲小弦促十歲嬌兒彈啄木啄木不啄新生枝

惟啄槎牙枯樹腹花繁蔽日鎖空園樹老參天杳深谷
不見啄木鳥但聞啄木聲春風和暖百鳥語山路磽确
行人行啄木飛從何處來花間葉底時丁丁林空山靜
啄愈響行人舉頭飛鳥驚嬌兒身小指撥硬功曹廳冷
絃索鳴繁聲急節傾四座為爾飲盡黃金觥楊君好雅
心不俗太學官卑飯脫粟嬌兒兩幅青布裙三脚木牀
坐調曲奇書古畫不論價盛以錦囊裝玉軸披圖掩卷
有時倦卧聽琵琶仰看屋客來呼兒旋梳洗滿額花鈿

貼黃菊雖然可愛眉目秀無奈長饑頭頸縮宛陵詩翁
勿謂渠人生自足乃為娛此兒此曲翁家無

初食雞頭有感

六月京師暑雨多夜夜南風吹芡觜凝祥池鎖會靈園
僕射荒陂安可擬爭先園客採新芭剖蚌得珠從海底
都城百物貴新鮮厥價難酬與珠比金盤磊落何所薦
滑臺撥醅如玉醴自慙竊食萬錢厨滿口飄浮嗟病齒
却思年少在江湖野艇高歌菱荇裏香新味全手自摘

玉潔沙磨軟還美一瓢固不羨五鼎萬事適情為可喜
何時遂買潁東田歸去結茅臨野水

晚泊岳陽

卧聞岳陽城裏鐘繫舟岳陽城下樹正見空江明月來
雲水蒼茫失江路夜深江月弄清輝水上人歌月下歸
一闋聲長聽不盡輕舟短楫去如飛

代贈田文初

感君一顧重千金贈君白璧為妾心舟中繡被熏香夜

春雪江頭三尺深西陵長官頭已白憔悴窮愁愧相識
手持玉笋唱陽春江上梅花落如積津亭送別君未悲
夢闌酒解始相思須知巫峽聞猿處不似荆江夜雪時

惠泉亭

翠壁刻孱顏煙霞跬步間使君能愛客朝夕弄山泉春
巖雨過春流長置酒來聽山溜響鑑中樓閣俯青池雪
裏峯巒開曉幌須知情興無時已酒美賓嘉自相對席
間誰伴謝公吟日暮多逢山簡醉淹留桂樹幾經春野

鳥巖花識使君使君今是罇前客誰與山泉作主人

寄聖俞

西陵山水天下佳我昔謫官君所嗟官閒憔悴一病叟
縣古瀟灑如山家雪消深林自劬筍人響空山隨摘茶
有時攜酒探幽絕往往上下窮煙霞品蓀綠縛軟可藉
野卉青紅春自華風餘落蘂飛回旋日暖山鳥鳴交加
貧追時俗翫歲月不覺萬里留天涯今來寂寞西岡口
秋盡不見東籬花市亭插旗鬪新酒十千得斗不可賒

材非世用自當去一舸聲牙揮釣車君能先往勿自滯
行矣春洲生荻芽

答朱宋捕蝗詩

捕蝗之術世所非欲究此語興於誰或云豐凶歲有數
天孽未可人力支或言蝗多不易捕驅民入野踐其畦
因之姦吏恣貪擾戶到頭斂無一遺蝗苗食苗民自苦
吏虐民苗皆被之吾嗟此語祇知一不完其本論其皮
驅雖不盡勝養患昔人固已決不疑東蟲投火况舊法

古之去惡猶如斯既多而捕誠未易其失安在常由遲
誅誅最說子孫衆為腹所孕多蛄蚘始生朝畝暮已頃
化一為百無根涯口含鋒刃疾風雨毒腸不滿疑常饑
高原下隰不知數進退整若隨金輦嗟茲羽孽物共惡
不知造化其誰尸大凡萬事悉如此禍當早絕防其微
蠅頭出土不急捕羽翼已就功難施只驚羣飛自天下
不完生子由山陂官書立法空太峻吏愚畏罰反自欺
蓋藏十不敢申一上心雖惻何由知不如寬法擇良令

告蝗不隱捕以時今苗因捕雖踐死明歲猶免為螻蛄
吾嘗捕蝗見其事較以利害曾深思官錢二十買一斗
示以明信民爭馳斂微成衆在人力頃刻露積如京坻
乃知孽蟲雖甚衆嫉惡苟銳無難為往時姚崇用此議
誠哉賢相得所宜因吟君贈廣其說為我持之告采詩
和對雪憶梅花

昔官西陵江峽間野花紅紫多爛斑惟有寒梅舊所識
異鄉每見心依然為憐花自洛中看花上蜀鳥啼綿蠻

當時作詩誰倡和粉藥自折清香繁今來把酒對殘雪
却憶江上高樓山羣花四時媚者衆何獨此樹令人攀
窮冬萬木立枯死玉豔獨發凌清寒鮮妍皎如鏡裏面
綽約對若風中仙惜哉北地無此樹霰雪漫漫平沙川
徐生隨我客北郡冰霜旅舍逢新年憶花對雪晨起坐
清詩寶鐵裁琅玕長河風色暖將動即看綠柳含春煙
寒齋寂寞何以慰卯杯且醉酣午眠

石篆詩

序

近蒙朝恩守此州州之西南有瑯琊山唐李幼卿
庶子泉者某在館閣時方國家詔天下求古碑石
之文集於閣下因得見李陽冰篆庶子泉銘學篆
者云陽冰之迹多矣無如此銘者常欲求其本而
不得於今十年矣及此來已獲焉而銘石之側又
陽冰別篆十餘字尤奇於銘文世罕傳焉山僧惠
覺指以示予予徘徊其下久之不能去山之奇迹
古今紀述詳矣而獨遺此字予甚惜之欲有所述

而患文辭之不稱思予嘗愛其文而不及者梅聖俞蘇子美也因為詩一首并封題墨本以寄二君乞詩刻于石

寒竒飛流落青苔旁斲石篆何竒哉
其人已死骨已朽此字不滅留山隈
山中老僧憂石泐印之以紙磨松煤
欲令留傳在人世持以贈客比瓊瑰
我疑此字非筆畫又疑人力非能為
始從天地胚渾判元氣結此高崔巍
當時野鳥踏山石萬古遺跡於蒼崖
山祇不欲人屢見

每吐雲霧深藏埋羣仙飛空欲下讀常借海月清光來
嗟我豈能識字法見之但覺心眼開辭慳語鄙不足記
封題遠寄蘇與梅

雪

時在潁州作五月梨花練絮
白舞鵲鶴銀等字皆請勿用

新陽力微初破萼客陰用壯猶相薄朝寒稜稜風莫犯
暮雪緜緜止還作驅馳風雲初慘澹炫晃山川漸開廓
光芒可愛初日照潤澤終為和氣爍美人高堂晨起驚
幽士虛窗靜聞落酒壚成徑集鉗罍獵騎尋踪得狐貉

龍蛇掃處斷復續
猊虎團成呀且攫
共貪終歲飽麋麥
豈惜空林饑鳥雀
沙墀朝賀迷象笏
桑野行歌沒芒屨
乃知一雪萬人喜
顧我不飲何為樂
坐看天地絕氛埃
使我習襟如洗滌
脫遺前言笑塵雜
搜索萬象窺冥漠
潁雖陋邦文士衆
巨筆人人把矛槊
自非我為發其端
凍口何由開一噓

奉使道中作三首

執手意遲遲
出門還草草
無嫌去時速
但願歸時早
北

風吹雪犯征裘夾路花開回馬頭若無一月還家樂爭
奈千山遠客愁

為客莫思家客行方遠道還家自有時空使朱顏老禁
城春色暖融怡花倚春風待客歸勸君還家須飲酒記
取思歸未得時

客夢方在家角聲已催曉怱怱行人起共怨角聲早馬
蹄終日踐冰霜未到思回空斷腸少貪夢裏還家樂早
起前山路正長

和子履遊泗上雍家園

長橋南走羣山間中有雍子之名園蒼雲蔽天竹色淨
暖日撲地花氣繁飛泉來從遠嶺背林下曲折寒波翻
珍禽不可見毛羽數聲清絕如哀彈我來據石弄琴瑟
惟恐日暮登歸軒塵紛解剝耳目異祇疑夢入神仙村
知君襟尚我同好作詩閱放莫可攀高篇絕景兩不及
久之想象空冥頑

御選宋詩卷二十五

謹案卷二十四第二頁前五行蛾眉代不乏刊本

蛾訛娥今改

第三十八頁後八行摩挲綠苔石刊本挲訛娑今
改

卷二十五第十七頁前七行正值山色含春寒刊
本值訛直今改

第二十一頁前二行誰得衆美如君兼按文忠集
注云一本此下有鏗鏘文律金玉寫森羅武庫


戈戟銘兩句

第二十一頁前七行晉祠按文忠集於此題下注
云一作過并州晉祠泉

第二十一頁後二行并兒自古事豪俠案文忠集
事作重與此異

第二十九頁前二行日落山風吹自醒按別本此
句下有沈夫子君過滁陽今幾時滁人皆喜醉
翁醉至今人人能道之長記山間逢太守藍輿

酩酊插花歸六句此從刪本



總校官庶吉士臣侍朝
校對官檢討臣蕭九成
謄錄舉人臣李駟